

I cascadiuu d'esperienza

*A la prima lüüs, i enn già nëlla zona di perniis;
càscen öcc e vann in sü, sémpèr püssee decìis.
L'è trii o guttr'ann che vann a càscia insèmm !
I can giren bèi liber e cèrchen quell che sèmm;*

*vann pooch distànt, pö se blöchen in mèzz a un praa.
Luur düü, cu'l s'ciopp in spalla, pàrlen del témp andàa:
"chì l'era tütt pàscul, adess files e ruéed de fa spavént.
Che riid ! I can i fèrmen ! Ann sentii quajcoss nel vént !".*

*De sòlit, cu'i can in ferma se càrga l'arma e se vàrda a bass.
Intànt un vul de cotùrni el se trà in ària cunt un gran fracass.
Ma luur, gnaa per i ball; vann innanz a ciciarà, pö d'un tratt
se vàrden n'i öcc: el s'ciopp l'è scàrich e riden cumè màtt.*

*"Questa ghe la cüntum a nissün; la sémm dumà nüin düü.
S'el vée a savèll quell che scriif, el me ciàpa per el cüü."
Però la léngua l'è lunga e a la fin la verità la véj a galla,
insci impàren a duprà i cartùcc e a tö-giù el s'ciopp de spalla.*

(M.M. 2009)